

BCA ta reacciona riba preocupacion encuanto tarifa di servicionan di pago

BANCO Central di Aruba (BCA) a tuma nota di e publicacionnan den medionan di prensa relaciona cu e preocupacion p'e tarifa cu banconan comercial ta cobra pa uza servicionan di pago cu carchi y kier informa e comunidad lo siguiente.

Actualmente no tin un ley pa regula tarifa cu e banconan local ta cobra pa uzo di servicionan di pago na Aruba. E banconan comercial por stipula e tarifanan aki nan mes. Den cuadro di su ambicion pa modernisa e sistema di pago na Aruba y mehora e experiencia di pago p'e consumidor y negoshi, BCA a tuma e iniciativa pa prepara dos concepto di ley p'asina por regula e sistemanan di pago na Aruba.

Ta trata di e concepto di leyman: Landsverordening toezicht betaaldienstverleners y Landsverordening toezicht aanbieders

van betalingssystemen. Actualmente e dos concepto di leyman aki ta den e proceso legislativo. Cu e concepto di leyman aki e meta di BCA ta pa establece sistemanan di pago na Aruba cu ta sigur, eficiente, confiabel y cu tarifanan rasonabel.

Ademas, construyendo riba e exito di e introduccion di I-Pago (BCA su sistema di pago instantaneo) na 2020, BCA tambe ta explorando solucionnan di pago innovativo pa por ehecuta pagonan di 'person-to-person', 'in-store' y 'e-commerce', uzando e sistema di I-Pago. Cu e solucionnan menciona lo introduci mas servicionan di pago cu lo contribui na un sistema di pago mas moderno pa Aruba, cual lo uza e sistema di pago instantaneo local.

Asina por tin mas control riba e tarifa di transaccionnan di pago y tambe lo por reduci e dependencia riba rednan di pago internacional. Relata na esaki, BCA ta colaborando cu e banconan comercial pa sigura un implementacion exitoso di e iniciativa aki.

Cu e iniciativanan menciona BCA kier sigura e comunidad cu ta haciendo esfuersonan significante pa logra sistemanan di pago mas regula, sigur y moderno.

Caso Flamingo Ministerio Publico ta insisti pa wordo cuestiona

DESPUES cu e politico y lider di PPA, Otmar Oduber a bay Corte na dos ocasion den ultimo dos aña pa e haya sa con ta para cu acusacionnan den su contra den e caso di Flamingo, ayera Ministerio Publico y Corte den Prome Instancia, a sorprende tur hende anunciando e ocho fechanan riba cual e caso aki lo wordo presenta dilanti Hues.

Ta dificil pa cuestiona tanto seriedad di Ministerio Publico y Corte den Prome Instancia, ya cu loke a keda publica riba "rol" ayera, ta muestra cu e caso Flamingo lo inicia dia 18 do November venidero manera cu a wordo anuncia anteriormente y por a tuma nota cu Corte hunto cu Ministerio Publico ta haya cu tin mester di ocho dia pa atende e proceso aki.

Despues di 18 di November, cu ta riba un dialuna, e caso lo sigui diaranson 20, despues diabierna 22 di November, dialuna 25 di November y despues diabierna 29 di November.

Te cu eyan no tin un "vuilte aan de lucht" pero na momento cu dialuna 2 di December lo sigui cu tratamento di e caso sigui diaranson 4 di December pa finalmente tratamento di e caso keda completa diabierna 6 di December, cu ta riba dia di eleccion.

E no por ta coincidencia, e no por ta algo cu Ministerio Publico no a cay ariba pero for di ayera merdia opinion general cu por a ser scucha tur caminda, e hecho aki caminda Corte ta tratando un caso penal contra di un ex mandatario y politico, net riba dia

di eleccion.

Riba e documento conoci como "rol" por a tuma nota cu Corte den Prome Instancia ta confirma diabierna mainta 6 di December y cu e caso lo inicia pa 8.30 di mainta y lo dura te cu 12'or di merdia, ya cu Corte tambe tin cu duna su personal 4 ora liber pa nan bay deposita nan voto.

Hopi ayera tardi a muestra cu nan no ta kere cu e "schema" publica aki pa tanto Corte den Prome Instancia y Ministerio Publico, ta un simpel coincidencia ya cu e rol mes ta muestra cu no tin ningun caso programa den oranan di merdia ya cu e departamento lo ta cera pa permiti segun ley, oportunidad na tur hende pa por bay deposita nan voto, cual pa ley esaki ta un periodo di 4 ora.

Hopi ta considera e desaroyo aki como algo di mala fe, ya cu mientras cu Otmar Oduber tin mas c'un aña hunto cu su abogado luchando pa haya claridad den e caso di Flamingo aki, entre otro caminda den e prome tratamiento di e caso Hues a confirma cu e tardansa ya no ta normal, awor ta presenta un caso caminda riba dia di eleccion, e decision aki sin duda lo afecta e presentacion di e lider di PPA.

Procurador General algun luna atras a muestra riba su preocupacion di criticanan cu nan tabata considera infunda riba nan forma di atende cu casonan contra ex minister- of politiconan pero e desaroyo aki ta uno sin sentido y logicamente e ta wordo cuestiona formalmente.

E solo hecho cu a dicide di pone e caso Flamingo riba dia di eleccion, e ta muestra sin duda un acto di mala fe y ta duna e impresion cu Otmar Oduber tin cu paga pa e forma con el a cuestiona e forma di procede di Ministerio Publico y Landsrecherche, fuera di cuestiona cierto desaroyonan den e investigacion di e caso aki contra su persona y otro sospechosonan.